

Dils fastedis dalla giuventetgna

Munconza da habitaziuns e d'in local da sentupada, communicaziun anoviars dalla vischnaunca e coworking. Quei ein ils temas principals che fatschentan il mument la giuventetgna a Mustér.

Hans Huonder/FMR

La suprastonza communal da Mustér ha vuliu saver dalla giuventetgna nua ch'il calzer smacchi. Per quei motiv ha ella envidau la giuventetgna ad ina discussiun. Da quella ei sortiu che la munconza da spazi da habitar caschuna il mument fastedis. «Igl ei il mument fetg grev d'anflar habitaziuns a Mustér», di *Rafael Maissen* (28) ch'ei separticipaus alla discussiun. Ei regia ina munconza da habitaziuns pintgas per persunas singulas, denton era grondas per cuminonzas da habitar. «Da quella problematica ei la vischnaunca pertscharta, aschi bein sco dalla munconza d'in liug da sentupada», ha il president communal *René Epp* detg sin damonda dalla FMR. In auter tema ei ina pusseivladad da coworking en vischnaunca staus. Tenor Rafael Maissen pudess ina tala purschida survir ad indigens che lavuran ordeifer, mo era a glied che ha ina habitaziun da vacanzas. La fin finala ei era la communicaziun anoviars dalla vischnaunca stada in tema a quella sentupada. «Oz van las informaziuns tier la glied», di Rafael Maissen. Il model da stuer tschercar ellas – per exempel el Fegl official dalla Surselva ni silla homepage – seigi mo per part actuals. La suprastonza communal vul cuntinuar cun quei dialog culla giuventetgna. Tenor René Epp savessi ina pintga cumissiun cun giuvenils survir a quei intent. La discussiun culla giuventetgna ei stada ina part dil project da participaziun per affons e giuvenils da vischnauncas grischunas da jugend.gr. **Pagina 5**

Habitaziuns – local da sentupada – communicaziun – coworking

La suprastonza communal da Mustér ha envidau la giuventetgna ad ina sera da discussiun. Da quella ein sorti ils fastedis e giavischs dils giuvenils. La munconza da habitaziuns pagablas e d'in local da sentupada, mo era la communicaziun dalla vischnaunca anoviars e pusseivladads da coworking (mira box) ein stai ils temas principals.

Hans Huonder/FMR

«Persunalmein vesel jeu il mument in grond basegns da habitaziuns e surtut d'ina ni pliras pusseivladads da coworking. Probabel luvrass beinenqual persuna da Mustér anora sch'ei dess la pusseivladad da far quei en in local bein endrizzau e cun outra glied.» Quei di *Rafael Maissen* (28) ch'ei separticipaus dacuort all'orientaziun e discussiun dalla giuventetgna culla suprastonza communal. Quella ei stada presenta in corpore. «Nus essan fetg satisfatgs dalla discussiun», di *Jris Lombris*, la geraua responsabla per ils fatgs da giuventetgna. Il president communal *René Epp* sesenta confermaus en differents puncts, surtut in: «La situaziun dalla munconza da habitaziuns ei acuta. Nus stuein mirar da sliugar quei problem.» La discussiun culla giuventetgna ei stada in part dil project da participaziun per affons e giuvenils da

vischnauncas grischunas da jugend.gr. Per quei motiv ei la representanta da lezz'organisaziun, *Flurina Spreiter*, separticipada a quella sentupada.

Spazi da habitar ei scarts

La munconza da habitaziuns sefa valer dapi entgins onns a Mustér. «Tgi ch'enquera ina habitaziun fa quei praticamein adumbatten. Il basegns dalla giuventetgna ein habitaziuns pintgas per singuls ni lu era grondas per cuminonzas da habitar. Culla glied che vegn a luvrar el hotel Acla da Fontauna ni lu era el resort a Dieni ch'enquera habitaziuns, vegn la situaziun buca megliera. Quellas habitaziuns munglassen denton era esser pagablas per la giuventetgna», di Rafael Maissen che lavura el cantun Uri sco specialist per tgamunadis electronics per pendicularas. Per la vischnaunca sezza che dispona da negin terren en zona da baghegiar ed immobilias adattadas per ina midada d'intent ei la situaziun buca semplia. «Nus havein la pusseivladad da scaffir la basa persuenter ed animar eventuals investurs da baghegiar», di René Epp. Entginas ideas seigien en discussiun: «Nus lein che la giuventetgna sappi luvrar ed era viver tier nus.» La damonda da spazi da habitar stat il mument era en stretg connex culla revisiun dalla planisaziun locala che pertucca surtut la reducziun dalla zona da baghegiar.

Local da sentupada

La vischnaunca dispona bein d'in local da sentupada per la giuventetgna el plaunterren dalla halla Cons. Quel vegn nezegiaus da giuvenils dil scalem superiur ni da tals che han gest bandunau la scola obligatoria. «Nus havein fetg bunas pusseivladads da far sport, mo la purschida da sentupada e divertiment ei magra», constatescha Rafael Maissen che beneventa igl interess dallas autoritads communalas pils basegns dils giuvenils. Alla discussiun culs politichers ein differents loghens pusseivels vegni tematisai, aschia da reactivar la Placi Bar el Disentiserhof ni igl anteriur local da disco dil Postigliun el miez dil vitg. «Nus vegnin a profundar il proxim temps quei basegns. Tenor nies manegiar savess ins activar ina localitad sco liug da sentupada per la giuventetgna mo era sco liug per exempel per pigns arranschaments», di René Epp. Las localitads ch'ei stadas en discussiun ein en mauns privats, consequentamein basegna ei discuors culs possessurs.

Migliurar la comunicaziun

Medemamein ei la comunicaziun anoviar dalla vischnaunca stada in tema da discussiun. «Silla damonda, cons dils presents che legien las comunicaziuns officialas dalla vischnaunca el Feg official dalla Surselva, han quater da 23 rispundiu cun in gie», di René Epp. Per Rafael Maissen eis ei impurtont: «Cullas pusseivladads digitalas e medialas d'ozildi vegnan las informaziuns tier la glied. Tschercar ellas – per exempel silla homepage – fan buca biars.» La structura dalla homepage dalla vischnaunca da Mustér seigi els onns e pretendi ina miglior. «Nus essan pertscharts da quei problem e luvrein il mument vid in concept per la comunicaziun. En quel ein las medias socialas secapescha era in tema», sincerescha René Epp.

Mantener il contact

Suenter la discussiun culla giuventetgna persequitescha la suprastonza communalas las pusseivladads da mantener il contact vicendeivel. «Ina varianta fuss ina cumissiun da giuventetgna che fa ponderaziuns davart basegns e giavischs. Quella savess lu s'entupar regularme in culla suprastonza communalas», di René Epp. La giuventetgna fetschi uss ponderaziuns e communiccheschi lu sia vesta co il dialog duei continuar. Tenor la geraua Iris

Lombris duei ina proxima sentupada haver liug ella fuorma dall'emprema. Giuvenils da 16 entochen 30 onns seigien envidai a quella.

Coworking – luvrar da cuminonza

Las pusseivladads digitalas lubeschan oz a bia glied da luvrar da casa anora, seigi parzial ni era duront igl entir temps. «Jeu savess era far quei entgins dis, mo l'infrastructura persunter maunca», di Rafael Maissen. Tenor el duess la vischnaunca far l'emprova d'arver ina localitad per plazzas da lavur flexiblas: «Ei duvrass in local pli grond ed ina stanza pli pintga per saver telefonar ni far sedutas. Moniturs e stampaders – era gronds – fussen necessaris sper il mobiliar.» Sco quei che René Epp ha detg sin damonda dalla FMR, fa la vischnaunca ponderaziuns en quella direcziun: «El miez dil vitg – concretamein sillas parcelas dil Nani Bazar e dalla surbaghegiada dil Postigliun – dess ei eventualmein pusseivladadas da locals.» Rafael Maissen vesa la simbiosa denter habitaziuns, coworking e commerci: «Ei dat glied che ha cheu habitaziuns da vacanzas che less era luvrar da cheu anora entgins dis. En in liug central fuss quei d'avantatg per tuts, era pil commerci che profitass dil consum da quella glied.» (fmr/hh)

06.02.2023

Tschentar prioritads

Hans Huonder/FMR

La suprastonza communal da Mustér ha envidau la giuventetgna ad ina discussiun. En sesez ei quei nuot spectacular, quei han autoritads d'altres vischnauncas era gia fatg. Temas da discussiun ha ei apparentamein dau senza stuer far ina gliesta da tractandas. Il svilup economic da Mustér muossa ch'el ha persistenza sulettamein sch'ils basegns e giavischs era dalla giuventetgna vegnan risguardai.

Sco en biars auters loghens ei la munconza da habitaziuns il mument in dils gronds problems a Mustér. Quel pertucca buca mo la giuventetgna. Lezza denton tscherca spazi da habitar pagabel. Pei a pei culla promoziun da plazzas da lavur sto era quel dalla purschida da habitaziuns ir. Mo lu ei il svilup dil liug empermettents. Ideas e projects per habitaziuns novas che contribueschan a soluziuns ston vegnir examinai senza trer neutier pils cavegls paragrafs. Ed ei drova forsa era la promptadad d'in ni l'auter possessur d'ina habitaziun ch'ei occupada entginas paucas jamnas per onn cun hosps da vacanzas, d'affittar quella permanentamein ad indigens. Las casas novas da pliras habitaziuns construidas ils davos onns a Mustér muossan ch'il basegns da spazi da habitar ei gronds. Munconza da habitaziuns astga buca esser in tema mo dalla politica, mobein sto esser in da mintga singul che ha la pusseivladad da contribuir ad ina soluziun.

Enteifer la politica a Mustér ein biars projects en discussiun il mument. Buca tuts ein tuttina impurtonts ed urgents e buca per tuts sto vegnir presentau immediatamein ina soluziun. Il problem dallas habitaziuns che stat era en stretg connex culla revisiun dalla planisaziun locala, respectivamein la reducziun dalla zona da baghegiar, ei denton gronds. Quella damonda sto vegnir priorisada. Tgei portan plazzas da lavur, locals da giuventetgna e Center Fontauna sche la glied sa buca nua habitar? La cumbinaziun dalla lavur cullas activitads dil temps liber ei oz pli actuala che zacu. Biars loghens en muntogna – sco per exempel Mustér – san profitar da quei trend.